

NEHEMAYA labaar

Ki jiin Nehemaya gbouŋ na po

Gbouŋ na beerit bianjinba ki Nehemaya din nyii boorganu tiŋ ni ki jen, a wun kpaŋ Israel niib na ki sommib ki bin ŋamm maa Jerusalem doo joona nae.

¹ Mɔmaan nba ki Nehemaya, wunba tee Hakalia bija na din sobe na.

Nehemaya baka nba be Jerusalem po bi-aŋinba

Artaserses, wunba din tee Peesia kpanbar na naan dinu bina piinlee ni, ŋmaarik nba ki bi yir Kislef na ni, ki min Nehemaya be Susa nba tee digbansaakar na ni. ² N din boi Hanani nba tee n ninjamm na yeno, nan jaleeb nba nyii Juda ki baar na, ki jiin Jerusalem nan ti leeb Juu teeb nba din nyii Babilonn ki ŋmat na po. ³ Ki bi betin nan binba daan tinn ki jen be bi dantiŋ ni na be mabir ni bonchiann, ki boorganu nba din kɔɔ ki kpiab na ki chɔrimmi. Bi bia din betin nan Jerusalem joona na yeer ki dɔɔ tiŋ nie, a ki li gana nba ki bi din joor muu na, bi ki ŋammir, laa nyii li yoowa.

⁴ Maa gbat linba na kur yoo nba, ki n kar bui. N din jii daa bonchiann ki lor mɔb ki fabin, ki miar Yennu a, ⁵ “N Yomdaano Yennu nba be Yendouŋ ni, a tee Yenjaanne, ki ti tiina jaŋmaanii. A dia a mɔlora fanu nan binba

loona ki bia saak a mɔb. ⁶ Yennu, gotirin ki gbiint n miaru, nan maa mei yonnu nan nyiok ki teen a toontunna nba tee Israel teeb na. N pak kat nan timm Israel teeb tun yanbɔmma. Min nan n yeejamm tun yanbɔmma. ⁷ Ti tun bonbiir ki turawa, ki ki tun nan faa wannit biaŋinba na. Ti ki dia sennii nba ki a turit, ki li nyii a toontunnɔ Moses boor na. ⁸ Mɔtana, tiat linba ki a din yet Moses na a, ‘Li-i tee yimm Israel teeb na ki sak n mɔb, n saa yatie, ki yin kɔɔ digbanlia ni. ⁹ Ŋaan li-i tee ki i jen n boor, ki tun linba ki n senn na, maa lek bo yati tingbouŋ na kur po na, ŋaan n saa te yin jen siaminba ki n gann maa yii jiantirin na.’

¹⁰ “N Yomdaano, a toontunnae na, a tiɔŋ niib, ki a jii a yiikoo nan a panchiɔŋ na ki tinnib. ¹¹ Mɔtana, gbiintir min nan a toontunlia nba kur loon tin jianta na miaru. Turimin nyannu dinna, ki te kpanbar na-ii mɔk ninbatinu nanin.”

Mine din tee kpanbar na daturtɔɔ.

2

Biaŋinba ki Nehemaya saan Jerusalem

¹ Li ŋmaarii ŋanna poorpo, dasiar ki kpanbar Artaserses tan di jeet, ki n jii daan ki turo. U din daa ki ban lan ki n gorii ninbanummi. ² Ŋanne ki u boi a, “Bee ki a mantik gorii ninbaatiri? A ki yiar kaa, ŋaan a kii mɔk parpeenne.”

Ki li soorin jaŋmaanii, ³ ki n jiin a, “Chanbaa, Yennu n tura manfofoouk. Nlee ki n kii gorii ninbaatiri, li-i tee doo nba ki bi din pii n

yeejamm na ji tee langbent motana, ki li gana bia dii muuwa?”

⁴ Ki kpanbar na boin a, “A loon bee?”

Ki n miar Yennu nba be Yendouŋ ni na, ⁵ ŋaan yet kpanbar na a, “Chanbaa, li-i tee ki a par mei n paak, ki a saa sak nanin, fan ŋaan man saan Juda tiŋ ni, doo nba ki bi din pii n yeejamm na, ki saa ŋamm maa doo maŋ.”

⁶ Ki kpanbar na sak nan wun tun maa boi linba na, ki poobat na kar booko; ki kpanbar na boin maa saa jii yoo biaŋinba ki saan, nan maa tan saa jen yoo nba; ki n beto.

⁷ Ton, n din yeto maa wun sommin ki turin gbant ki n saan tur toontunna saakab nba be Yufrates yonbaa po yent na ni, ki bin chabin ki n saan Juda tiŋ ni. ⁸ N bia din yeto maa wun turin gbouŋ ki n saan tur Asaf, wunba guu kpanbar foor na, ki beto ki wun turin taabii ki tin ŋamm ŋapaaruk nba be Yenjiantu ŋasaakak boor na tammoi, ki bia ŋamm doo na joona, nan ŋaak nba ki n saa koo li ni na. Ki kpanbar na turin linba kur ki n loon, kimaan Yennu be nanin.

⁹ Kpanbar na din turin kunkonkonna saakab, nan kunkonkonna, ki bi jak taanii ki chianin saan Yufrates mokir yonbaa po. Lege ki n din tur tiŋ na yudamm gbant nba ki kpanbar turin na. ¹⁰ ŋaan Sanbalat, wunba din nyii Bef Horonn doo ni na, nan Tobia wunba tee toontunna saakoo, ki nyii Amonn teeb yent ni na nba gbat nan soo baar a wun tun toonn ki lin ŋamm Israel teeb na, ki bi wutoa doo.

¹¹ Ki n saan Jerusalem, ki daa ŋantaa na kur

¹² n din ki bet soo linba ki Yennu wannin a n

tun ki tur Jerusalem na po. Tɔn, ki n tan fir tansuuni ki jii n leeb waan, ki ti nyii nanyer. Bonkobuk nba ki ti din jii u tee boŋ nba ki n jakɔ nae. ¹³ N din fir doo na ni nyiɔko, ki tɔkin nyii doo na tammɔb nba ki bi yir Baauk po tammɔb na, ki li be yonbaa po, ki bia gar saan niidiitu po, ki gar baar nyuntonn nba ki bi yir Waauk Nyuntonn na, ki saan tammɔb nba ki bi yir Tanpenn Tammɔb na. Maa saa na, ki n got la doo na joona nba baa na, nan li gana nba ki muu dii ki biirir na. ¹⁴ Tɔn, n din tɔkin doo na yondo poe, ki saa li niigaŋ po, ki baar tammɔb nba ki bi yir Nyuntonn Tammɔb na, ki gar baar Kpanbar Nyun boor. Boŋ nba ki n jak na din ki la yiar nan wun gar tangbiina na ni. ¹⁵ Ŋanne ki n jakɔ sik Kidronn baauk na ni, ki lin gorii joonn na, ki tan ŋmat tɔkin sɔnu nba ki n bo baar na, ki tan kɔɔ tammɔb nba ki bi yir Baauk Tammɔkookir na, ki kɔɔ doo na ni.

¹⁶ Toontunna saakab na, bi sɔɔ din ki mi maa saan siaminba, koo maa tun linba, ki tan tuu li yoo. N din ki yet siar ki tur n leeb Juu teeb na, li manteeb nan tɔndamm nan toona saakab, koo wunba kur saa pukin toona na tumu ni.

¹⁷ Tɔn, ki n ji yetib a, “Gotir man taa be daamii nba ni na, kimaan Jerusalem ji tee langbente, ki li joona yeera. Ŋaant ki tin ŋamm maa doo maŋ joona ki nyi fei ni.” ¹⁸ Ki n ji betib Yennu nba be nanin, ki bia sommin biaŋinba, nan kpanbar na nba yetin linba.

Ki bi jiin a, “Ŋaant ki ti ŋamm maa.” Ki bi teen siir a bin piin bi toonn.

¹⁹ Ki Sanbalat nan Tobia nan Arab niro nba ki bi yiu Gesem na nba gbat taa lor a tin tun linba

na yoo nba, ki bi laat, ɲaan yet a, “I dukii a i tuun bee? I loon yin kɔn nan kpanbar nae-e?”

²⁰ Ki n jiin a, “Yennu nba be Yendouɲ ni nae saa turit nyannu. Ti tee u toontunnae, ki yaa ti piin kii maa. ɲaan yimm ɲarin, i nuu kaa faar nba be Jerusalem na ni, ki i bia ki pukin li kaar ni.”

3

Biaɲinba ki bi ɲamm maa Jerusalem joonn

¹ Baa din maa doo na joonn biaɲinbae na. Eliasib, wunba din tee mannteeb yudaano na, nan u mannteleeb din ɲamm maa Pei Tammɔb na joonn, ki kɔn li gana ki jii jiin tur Yennu. Bi din jii joonn nba saa difoouk nba ki bi yir Kobik na, nan difoouk nba ki bi yir Hananel na, ki jiin tur Yennu.

² Ki Jeriko jab maa bɔkir nba waa na.

Ki Sakur, wunba tee Imri bija na maa bɔk-leer.

³ Hasena naakuuk ni teeb din maa Janii Tammɔb na joonn. Bi din chaan ganchaatae, ki kɔn li gana nan gankpata.

⁴ Ki Meremof, wunba tee Yuria bija, ɲaan tee Hakos yaabonn na maa bɔkir nba waa na.

Ki Mesulam, wunba tee Berekia bija, ɲaan tee Mesesabel yaabonn na maa bɔkir nba waa na.

Ki Sadok, wunba tee Baana bija na maa bɔkir nba waa na.

⁵ Ki jab nba nyii Tekoa na maa bɔkir nba waa na, ɲaan Tekoa tɔondamm na din yêt doo toonn nba ki toonn saakab sennib a bin tun nawa.

⁶ Joyada, wunba tee Pasea bija na, nan Mesulam, wunba tee Besodeya bija na, din ɲamm maa Jesana Tammɔb na joonn. Bi din chaan ganchaata, ki kɔɔn li gana nan gankpata.

⁷ Melatia, wunba nyii Gibeonn na, nan Jadonn, wunba nyii Meronof na, nan jab nba nyii Gibeonn nan Mispa na, din maa bɔkir nba waa na, ki saa tuu Yufrates yonbaa po yent yudaano ɲaak.

⁸ Ki Usiel, wunba tee Har-haya bija, ki tee salima saauk kurtɔɔ na, maa bɔkir nba waa na.

Ki Hanania, wunba ɲamii tulaarii na maa bɔkir nba waa na, ki saa tuu joonn nba ki bi yir Joon-yaruɲ na.

⁹ Ki Refaya, wunba tee Hur bija ki dia Jerusalem yent bɔkir na maa bɔkir nba waa na.

¹⁰ Ki Jedaya, wunba tee Harumof bija na, din maa bɔkir nba waa, ki kpia nan u moɲ ɲaak na.

Ki Hatus, wunba tee Hasab-neya bija na maa bɔkir nba waa na.

¹¹ Ki Malkija, wunba tee Harim bija na, nan Hasub, wunba tee Pahaf Moab bija, din lakin maa bɔkir nba waa na, nan difoouk nba ki bi yir Bonpur-diiuk na.

¹² Ki Salum, wunba tee Halohes bija ki dia Jerusalem yent bɔkleer na maa bɔkir nba waa na. (U bonpoie din sommo ki u tun toonn na.)

¹³ Hanunn nan Sanoa doo ni niib din ɲamm maa Baauk Tammɔb na. Bi din chaan ganchaata, ki kɔɔn li gana nan li gankpata, ki bia ɲamm joonn na, ki li yarimu tee taakaabii kobii ɲanɲmu, ki saan tuu Tanpenn Tammɔb.

14 Malkija, wunba tee Rekab bija nba dia Bef Hakerem yent na, din ɲamm maa Tanpenn Tammɔb na, ki chaan ganchaata, ki kɔɔn gana nan gankpata.

15 Ki Salum, wunba tee Kol-hose bija ki dia Mispā yent na, ɲamm maa Nyuntonn Tammɔb na. U din pin tammɔb na yur paake ki ɲamm senn li gana, ki kɔɔn gankpata. U bia din maa joona na ki nyii Sela nyun boor ki gar naan kpaab na boor, ki saa tuu sɔnsau nna; ki sɔnu maɲ nyi siaminba ki bi yi Defid doo na.

16 Ki Nehemaya nba tee Asbuk bija ki dia Bef-sur yent bɔkir na maa bɔkir nba waa na, ki saan tuu Defid kaauk nan nyundɔɔnn na, ki dian kunkɔnkɔnna ɲaak na.

Ki jiin Liifai teeb nba din maa joonn na po

17 Liifai teeb nae din ɲamm maa joonn na bɔklier nba waa na:

Rehum, wunba tee Bani bija nae din maa bɔkir nba waa na.

Ki Hasabia, wunba dia Keila yent bɔkir na set u yent paak, ki maa bɔkir nba waa na.

18 Ki Bafai, wunba tee Henadad bija, ki dia Keila yent bɔkleer na maa bɔkir nba waa na.

19 Ki Eser, wunba tee Jesua bija, ki dia Mispā doo na maa joonn nba be tɔb tiat diiuk tɔɔnn po na, ki saan tuu siaminba ki joonn na gɔnt.

20 Ki Baruk, wunba tee Sabai bija na maa bɔkir nba waa na, ki saan tuu mannteeb yudaano Eliasib ɲaatammɔkɔkir.

21 Ki Meremof, wunba tee Yuria bija ki tee Hakos yaaboonn na maa bɔkir nba waa na, ki saan dian Eliasib ɲaak kpiɲ.

Ki jiin mannteeb nba din maa joonn na po

²² Mannteeb nba nae din ɣamm maa joonn na bɔka nba waa na:

Mannteeb nba din kɔɔ kpia Jerusalem nae din maa bɔkir nba waa na.

²³ Ki Benjaminn nan Hasub maa bɔkir nba waa ki be bi ɣei tɔonn po na.

Ki Asaria nba tee Maseya bija ki tee Anania yaaboonn na maa bɔkir nba waa, ki be u ɣaak tɔonn po na.

²⁴ Ki Binnui, nba tee Henadad bija na maa bɔkir nba waa na, laa nyii Asaria ɣaak ki saan tuu siaminba ki joonn na ɣont.

²⁵⁻²⁶ Palal, wunba tee Usai bija na din maa bɔkir nba waa na, laa nyii joonn na nba ɣont siaminba, nan difoouk nba be naan ɣaak nba be paapo na, ki kpia nan guuteeb dindouŋ na.

Ki Pedaya, wunba tee Paros bija na maa bɔkir nba waa ki jiin yondo po, ki li kpia Nyun Tammɔb na, nan difoouk nba kpia Yenjiantu ɣasaakak na, (li din kpia doo na bɔkir nba ki bi yi Ofel nae, siaminba ki Yenjiantu ɣasaakak toontunna be na.)

Ki jiin tanmaaleeb na po

²⁷ Jab nba nyii Tekoa nae din maa bɔkir nba waa na, bi taar munlee nie na; bi din nyii difoouk nba kpia Yenjiantu ɣasaakak na poe, ki maa ki saa tuu joonn nba kpia doo maŋ bɔkir nba ki bi yir Ofel na.

²⁸ Manntesiab din taan ki maa bɔkir nba waa na, laa nyii Taanii Tammɔb na, ki saan tuu niigaŋ po, ki sɔɔ kur maa bɔkir nba be u ɣaak tɔonn po.

29 Sadok, wunba tee Imer bija na din maa bɔkir nba waa ki be u ŋaak toonn po na.

Ki Semaya, wunba tee Sekania bija, ki guu yondo po tammɔb na maa bɔkir nba waa na.

30 Ki Hanania, wunba tee Selemia bija, nan Hanunn, wunba waa Salaf bonjai banloob ni na maa bɔkir nba waa na, bi taar munlee nie na.

Ki Mesulam, wunba tee Berekia bija na maa bɔkir nba waa ki be u ŋaak toonn po na.

31 Ki Malkija, wunba tee salima saauk kurtɔɔ na maa bɔkir nba waa na, ki saan tuu ŋaak nba ki Yenjiantu ŋasaakak toontunna nan kpinkpenta be na, ki li kpia Yenjiantu ŋasaakak tammɔb nba ki bi yir Guura Tammɔb na, ki li kpia diiuk nba be niigaŋ po ki jiin yondo po jonn na gungɔnt boor na.

32 Ki salima saauk kurteeb na, nan kpinkpenta na maa bɔkir nba joont na, laa nyii gungɔnt boor diiuk na, ki saan tuu Pei Tammɔb na.

4

Biaŋinba ki Nehemaya nyann u datai

1 Sanbalat nba gbat nan timm Juu teeb ŋamii maa jonn na yoo nba, ki u wutoor doo, ki u piin ki sukiit, 2 ki yet u leeb nan Samaria kunkonkonna na numm ni a, “Juu teeb nba tee bonbutimii na dukii a bi tuun bee? Bi lor a bin ŋamm maa doo nae-e? Bi dukii nan bi maruŋ nae saa te ki bin gbenn toonn na dayenn koɔɔ? Bi saa fit nyinn tanmaakara tangbiinkpeka nba dii muu na niwa-a?”

³ Ki Tobia, wunba tee Amonn niro ki see lenj ki kpiau na mun bia yet a, “Bi saa fit maa joonboorbee? Lunlonn gbaa saa fit tut luwa.”

⁴ Ki n miar Yennu a, “Yennu, gbiintir baa sukiit bianjinba. Ijaant ki bi sukut na n ηmat bi yura paak, ki ηaan siab n fat bi mōkint kur, ki bia soorib ki saan namm boorganu tinj ni, ki teemm yommii. ⁵ Bi toonbiit nba ki bi tuun na, a daa nyikin chabitibi, ki bia daa tammit bi yanbōmm na po, kimaan bi sukii timm nba maa nae.”

⁶ Tōn, ki taa tukin joonn na maanu, li ki wei kaawa ki ti kōō li sinsuuk ni, kimaan niib na ninbina din mōn toonn na paak.

⁷ Ki Sanbalat nan Tobia nan Arab teeb nan Amonn teeb nan Asdod teeb na nba gbat nan ti ηamii maa Jerusalem joonn, ki li saa fanu, ki joonn na yiar mubint yian yian na, ki bi wutoor mantik doo, ⁸ ki bi kur taan leeb ki lor a bin baar lek Jerusalem, ki ηmatir n baar. ⁹ Ki ti miar Yennu, ηaan ji te ki jab guu yonnu nan nyiok.

¹⁰ Juda teeb na din tuu mōk bi yaŋ ki yiin a: “Ti jii jik-kpiata ki baka.

Tangbiina na yabit nan tin jiiwa,

ki nlee ki ti saa maa joonn na dinna?”

¹¹ Ti datai na dukin nan ti kan labi, koo ti kan bann baa tuun linba, see ki bi tan baar ki kpiit, ki bia gōōr toonn nba ki ti tuun na.

¹² Ijaan yoo n tuu yoo, Juu teeb nba kōō nan ti datai maŋ na tuu baar ki tan wannit ti datai na nba lorin linba ti paake. ¹³ Ijanne ki n tur niib na jukbanjai nan kpana nan tōrbana, ki sennib

naakuuk naakuuk, joonn na lanpoor, siaminba ki bi daa ki maa gbenn na.

¹⁴ N din la nan niib na para biire; ki n yet gamm nan bi tɔndamm nan bi toontunna saakab a, “I daa tiin ti datai na janmaanii. Tiat man Yennu nba tee Yenjaann, ki bia tuun bakitnaurɔ toona biajinba, ki kɔn ki tur i doo teeb nan i waas nan i ɔapooob nan i ɔei.” ¹⁵ Ki ti datai na gbat nan ti bann linba ki bi lorin nawa, ki bi ji bann nan Yennu biir bi lora maɔa. Tɔn, ki ti kur ji ɔmat saan ki ɔmii maa joona na.

¹⁶ Laa din nyii li yoo maɔ, n jab na bɔkir din tuune, ɔaan ki bɔkleer see ki guut, ki lia kut tɔbliata, ki dia kpaa nan naagbankɔɔa nan tɔrbana; ki ti tɔndamm na din teen niib ¹⁷ nba ɔmii maa joonn na bi sommir. Binba lek din jikit tanmaa bona na din tuun niyeɔe, ki niileu dia jatiok. ¹⁸ Ki binba maa na kur yoo jukbanjai bi sai ni, ki jɔɔ nba saa peb naatunn na be n boor ni. ¹⁹ Ki n bet niib na nan bi tɔndamm nan bi toontunna saakab na a, “Toonn na tant ki fɔkita, ki te ki ti yat leeb joonn na kur po. ²⁰ I-i tanɔi gbat naatunn na, ii taan n boor ni. Ti Yennu saa kɔn ki turit.” ²¹ Li paak, daar kur, laa tuu nyi sanyafaar ki saa tuu nyiok, ti bɔkir tuune joonn na paak, ɔaan ki bɔkleer see nan kpaa ki guut.

²² Li yoo na, ki n yet jab nba tee toonn saakab na, nan bi somm teeb na kur, a bii be Jerusalem, ki tuu guur doo na nyiok, kii biaki tuun toonn na yonnu ni. ²³ N din ki liatir n liant na nyioku, ɔmee ji boi n leeb na, koo n

toontunna na, koo binba guun na. Ti kur din dia jatiate ti nii ni.

5

Ki jiin nandamm na talas dinu po

¹ Li poor poe ki niib na bonchiann, li jab nan poob, piin ki baat nan bi daamii ki jiin bi leeb Juu teeb po. ² Bi siab yeen a, “Ti n̄aateeb yab bonchiann, ki ti loon jeet ki lin foorit.”

³ Ki leeb yaa, “Ti jii ti sarwaat, nan ti daan tiinii kpaant, nan ti n̄eie ki senn n̄aan gaar jeet nba saa jan̄it ki tin nyi kon ni.”

⁴ Ki siab mun yaa, “Ti kpentir likiriie ki fit pa naan lampo nba ki bi gaan ti sarwaat nan ti daan tiinii kpaant paak na. ⁵ Timm nan ti Juu leeb na tee booryeje. Ti waas ki n̄an nan bi waas na kaa-a? N̄aan ti teen ti waas na daabae. Ti k̄oi ti bonpoi na siabe ki teemm daaba. Ti ji ki m̄ok pāni, kimaan bi gaar ti kpaant nan ti daan tiinii sarwaata.”

⁶ Maa gbat bi maan māj yoo nba, ki n wutoor doo, ⁷ ki n lor nan man got bi bar̄ii māj ni. Ki n yakii nan t̄oondamm nan toontunna saakak na, ki betib a, “I diin i ninjamme.”

N din yiin niib na tintaanu maa min got bar̄ii māj ni, ⁸ ki yet a, “Ti tuu n̄mat daa ti ninjamm Juu teeb nba k̄oi bi m̄ōj ki teen boorganu nae, nan taa fit bian̄inba na. M̄otana, i mukis i t̄iōj ninjamm nae ki bi k̄oi bi m̄ōj ki teen yimm nba tee bi leeb Juu teeb na.” Ki t̄oondamm na ji k̄ōj baa saa yet linba, ki n̄min soon nna.

⁹ T̄on, ki n yet a, “Linba ki i tuun na ki n̄ani. See ki i sak Yennu m̄ob ki tun linba n̄an, n̄anne

saa te ki ti datai nba tee boorganu na kan la yaak ki sukiiti. ¹⁰ Min nan n saakaleeb nan jab nba tuun n boor na, ti kpentir likirii nan jeet ki teen niib na. Motana, ɲaant ki ti chabib ki bi daa pa. ¹¹ Ii kpi baa mok i pana nba kur, laa tee likirii amii jeet amii tilɔɔna daan amii olif tiinii kpamie, ki jiin bi sarwaat, nan bi daan tiinii na kpaant, nan kpan tiinii, nan bi ɲei, ki turib yiama.”

¹² Ki tɔɔndamm na jiin a, “Ti saa tun nan faa yet biaɲinba nawa. Ti saa jiin bi faar nawa, ki kan mi boib pana na po.”

Ki n yiin mannteeb na, ki te tɔɔndamm na por bi numm ni nan bi saa dia mɔsonn nba ki bi senn nawa. ¹³ ɲanne ki n bobit tann nba boob n siak ni na, ki pinnir, ɲaan yet a, “Yennu tan saa pinn daansɔɔ nba ki dia u mɔsonn nan maa pinn n tann na biaɲinba nae. Yennu saa gaar i ɲei nan linba kur ki i mok na ɲaan nyiki yann.”

Ki sɔɔ kur nba be leɲ na yet a, “Lii tee nna,” ɲaan pak Yennu. Ki tɔɔndamm na ji gbeen bi mɔsona.

Nehemaya nba ki wuun biaɲinba

¹⁴ Kpanbar Artaserses naan bina piinlee niɲe ki bi din turin Juda yudant, ki tan tuu u naan bina piintaa nan ɲanlee ni, ki li tee n yudant bina piik nan ɲanlee ni, ɲaan min koo n nikpiimm na sɔɔ ki dii jeet nba bo kpaalalas nan min yudaano n di. ¹⁵ Wunba kur din teen yent yudaano n liik tuu tee jikire niib na paak. U tuu gaan salimpeena piinnae daar kur ni, ki li tee jeet nan daan paak. Bi toontunna na

gbaa mun bia tuu diin niib nae, ɲaan min ɲarin ki tuun nna, kimaan n tiin Yennu, ¹⁶ ki jii n paɲ kur ki waan joonn na maanu ɲaan ki boi faar po. Wunba kur tuun n boor taanin ki ti ɲamii maa joonn na. ¹⁷ N din yoo dint Juu teeb nan bi tɔɔndamm kobik nan piinɲmue n ɲaak ni, ki pukin binba kur nyi digbangana ki baat n boor. ¹⁸ Ki daar kur ni, n tuu tur naab nan pei nba ɲan banloobe, nan korii bonchiann, ki dapiik kur ni ki n teemm dabooru booru. N poɲ din mi talas nba ki niib na dii, li paak ki n ki boi sommir nba ki doo yudaano bo saa gaar na po. ¹⁹ Yennu, n meia maa fii tian maa tun linba kur ki tur niib na ki ɲammin.

6

Baa lor Nehemaya paak bianɲinba

¹ Ki Sanbalat nan Tobia nan Gesem nan ti datalei na gbat nan ti maa joonn na ki gbenna, ki yiar ji ki biar, ɲaan ki ti daa ki kɔɔn ganae tammokɔka na ni. ² ɲanne ki Sanbalat nan Gesem turin mob a n tookib Ono paanu ni, digbanbis na yenn ni. Linba na din tee kpare, ki bi koor a bin biirin. ³ Ki n tun toonii ki betib a, “N kan baari, n tuun toonn nba kpaa talase. N kan fit nyik toonn maɲ ɲaan baar ki tan laini.”

⁴ Bi din tun toonii taar munna n boor, ɲaan yoo kur n din teemm gatyemmire.

⁵ Ki Sanbalat ɲamm tun u toontunna na yeno n boor nan mɔmaan nba pukin munɲmu ni, ki li sob gbouɲ nba ki loon ni. ⁶ Ki gbouɲ na yet a:

“Gesem betin nan bunburimii be niib nba koo nant na sinsuuk ni, a fin nan Juu teeb na lor yin yêť kpanbar mobe, li paake ki i maa joonn na. U bia yet nan a lor fan teen a moŋ bate, ⁷ ki a lor nan Yennu sokiniinba siab a bin moont Jerusalem nan fine ji tee Juda bat. Kpanbar na saa gbat maan nawa. Li paake ki n dukin nan min nan fin n taan leeb ki got maan maŋ ni.”

⁸ Ki n turɔ gatu a, “Linba ki a yeen na kur ki tee barmonii, fine dukin na kur a tiɔŋ.”

⁹ Bi din koor a bin jeenite ki tin nyik toonn na. Ki n miar Yennu a, “Turimin paŋ mɔtana.”

¹⁰ Yoo nba nae ki n din saan gɔn Semaya, wunba tee Delaya bija, ŋaan tee Mehetabel yaaboonn na. U din ki tee u nyii u ŋaak ni. U din yetin a, “See fin nan min lakin saan bɔr Yenjiantu ŋasaakak na ni, ŋaan kpar li gana, kimaan bi baat a bin kpia. Bi saa baar nyioko ki tan kpia.”

¹¹ Ki n jiin a, “N ki tee nibooru nba tiin ki bɔri kaa. A dukin nan n sii koor a man bɔr Yenjiantu ŋasaakak na nie ki tinn n manfoori-i? N kan teen nna.”

¹² Maa dukin li po yoo nba, ki n bann nan Yennu kaa pak ki tur Semaya, ŋaan li tee Tobia nan Sanbalat-e koo a wun turin li kpaan booru. ¹³ Bi jooŋɔe a wun jeenin ki n tun biit, ki lin te n sann n biir, ki man di fei.

¹⁴ Ki n miar Yennu a, “Tiat linba ki Tobia nan Sanbalat tun na po, ki dat bi tuba. Tiat poo nba sann tee Noadia na po, nan sokiniileeb nba kur koor a bin jeenin na.”

Ki jii toonn na gbennu po

¹⁵ Ti din jii daa piingmu nan njanlee-e, ki tun joonn na toonn ki gbenn, nmaarik nba ki bi yir Elul na, li dapiinlee nan njanngmu daar. ¹⁶ Ti datai nba din koo digbana nba kpiat na nba gbat linba na yoo nba, ki bi bann nan bi koo nyannuwa, kimaan soo kur bann nan ti tun toonn na nan Yennu sommire.

¹⁷ Yoo nba na kur, njan Juu teeb toondamm na nan Tobia din sob gbant bonchiann ki tur bi leeb. ¹⁸ Juda teeb bonchiann din taa u po, kimaan waa dantir nan Juu niro Sekania, wunba tee Ara bija na paak. Linba pukin, u bija Jehohanann din koon Mesulam, wunba tee Berekia bija na bipooe. ¹⁹ Niib din tuu piak Tobia toonjana poe n boor, ki bia kumiio maa yet linba kur, ki u teenin gbant ki yiab a wun jeenin.

7

¹ Ton, taa namm maa joonn na, ki koon li gana na poor poe, ki ti wann Yenjiantu nasaakak na tammoguura, nan yanyinna, nan Liifai teeb, bi toona. ² Ki n jii jab banlee ki teemm Jerusalem doo yudamm, ki bi tee n ninja Hanani, nan Hanania nba tee kunkonkonna yudaano na. Hanania din tee nimono ki bia tiin Yennu, ki u loo kaa. ³ N din betib maa bi tuu daa lootir Jerusalem tammoi sanyapob ni, ki yonnu n toja. Ki daajoouku baar, bin bia tuu loon ki kpar tammoi nawa, ki tammoguura nan n fit seet. N bia din yet a bin jii binba koo Jerusalem doo ni nae ki teemm

guura, ki te siab-ii guu siar po, ŋaan ki leeb-ii guu kii kpia bi moŋ ŋei.

*Binba din nyii Babilonn ki jen na sanae na
(Esra 2.1-70)*

⁴ Jerusalem din tee digbangbenjire, ŋaan niib din ki yab leŋi, ki ŋei bia daa ki yabi.

⁵ Yennu din turin yan ki n tikir niib na, nan bi tɔɔndamm, nan bi toontunna saakab, ki got bi sana ŋaak ŋaak. N din la binba nyii Babilonn sinsinn ki jen na sana gbant. Mɔmaan nba ki n la leŋe na:

⁶ Niib bonchiann din nyii Babilonn yent ni ki ŋmat kun Jerusalem doo nan Juda yent ni, ki soɔ kur kun u tiɔŋ doo ni. Bi ŋaateeb poŋ din be Babilonn tiŋ ni, laa nyii yoo nba ki kpanbar Nebukanesar soorib ki teemm yommii nawa.

⁷ Bi tɔɔndamm din tee Serubabel nan Joosua nan Nehemaya nan Asaria nan Ramia nan Nahamani nan Mordekai nan Bilsann nan Misperef nan Bigfai nan Nehum nan Baana.

⁸⁻²⁵ Israel naakuut nba din nyii Babilonn ki jen na sana, nan bi niib kanne na:

Paros naakuuk ni niib din tee tusaa ŋanlee nan kobik nan piinlore nan banlee.

Ki Sefatia naakuuk ni niib tee kobii ŋantaa nan piinlore nan banlee,

ki Ara naakuuk ni niib tee kobii ŋanloob nan piinŋmu nan banlee,

ki Pahaf-Moab naakuuk ni niib tee tusaa ŋanlee nan kobii ŋanniin nan piik nan banniin; ki bi tee Jesua nan Joab yaaboona,

ki Elam naakuuk ni niib tee tusir nan kobii ŋanlee nan piinŋmu nan banna,

ki Satu naakuuk ni niib tee kobii ḡanniin nan piinna nan banḡmu,

ki Sakai naakuuk ni niib tee kobii ḡanlore nan piinloob,

ki Binnui naakuuk ni niib tee kobii ḡanloob nan piinna nan banniin,

ki Bebai naakuuk ni niib tee kobii ḡanloob nan piinlee nan banniin,

ki Asgad naakuuk ni niib tee tusaa ḡanlee nan kobii ḡantaa nan piinlee nan banlee,

ki Adonikam naakuuk ni niib tee kobii ḡanloob nan piinloob nan banlore,

ki Bigfai naakuuk ni niib tee tusaa ḡanlee nan piinloob nan banlore,

ki Adinn naakuuk ni niib tee kobii ḡanloob nan piinḡmu nan banḡmu,

ki Ater, wunba ki bi bia yiu Heskia na, naakuuk ni niib tee piinyia nan banniin,

ki Hasum naakuuk ni niib tee kobii ḡantaa nan piinlee nan banniin,

ki Besai naakuuk ni niib tee kobii ḡantaa nan piinlee nan banna,

ki Harif naakuuk ni niib tee kobik nan piik nan banlee,

ki Gibeonn naakuuk ni niib tee piinyia nan banḡmu.

26-38 Niib nba ki bi yeejamm din koo doi nba na ni mun bia din jenna:

Betlehem nan Netofa doi teeb din tee niib kobik nan piinniin nan banniin,

ki Anatof doo ni niib tee kobik nan piinlee nan banniin,

ki Bef Asmafef doo ni niib tee piinna nan banlee,

ki Kiriaf Jearim nan Kefira nan Beerof doi ni
 niib tee kobii ŋanlore nan piinna nan bantaa,
 ki Rama nan Geba doi ni niib tee kobii
 ŋanloob nan piinlee nan yenokoo,
 ki Mikmas doo ni niib tee kobik nan piinlee
 nan banlee,
 ki Betel nan Ai doi ni niib tee kobik nan
 piinlee nan bantaa,
 ki Nebo digbanleer na niib tee piinŋmu nan
 banlee,
 ki Elam digbanleer na niib tee tusir nan kobii
 ŋanlee nan piinŋmu nan banna,
 ki Harim doo ni niib tee kobii ŋantaa nan
 piinlee,
 ki Jeriko doo ni niib tee kobii ŋantaa nan
 piinna nan banŋmu,
 ki Lod nan Hadid nan Ono doi ni niib tee
 kobii ŋanlore nan piinlee nan yeno,
 ki Senaa doo ni niib tee tusaa ŋantaa nan
 kobii ŋanyia nan piintaa.

³⁹⁻⁴² Mannteeb naakuut nba din nyii Babilonn ki jena: na:

Jedaya, ki u naakuuk ni niib tee kobii ŋanyia
 nan piinlore nan bantaa, ki tee Jesua yaa-
 boona,

ki Imer naakuuk ni niib tee tusir nan pi-
 inŋmu nan banlee,

ki Pasur naakuuk ni niib tee tusir nan kobii
 ŋanlee nan piinna nan banlore,

ki Harim naakuuk ni niib tee tusir nan piik
 nan banlore.

⁴³⁻⁴⁵ Liifai naakuut nba din nyii Babilonn ki
 jene na:

Jesua nan Kadmiel, ki bi naakuut ni niib tee
 piinlore nan banna, ki tee Hodafia yaaboona,

ki Yenjiantu ɲasaakak na ni yanyinna tee kobik nan piinna nan banniin, ki tee Asaf yaaboona,

ki Yenjiantu ɲasaakak na guura tee kobik nan piintaa nan banniin, ki tee Salum nan Ater, nan Talmonn, nan Akub, nan Hatita nan Sobai yaaboona.

⁴⁶⁻⁵⁶ Yenjiantu ɲasaakak na ni toontunna naakuut nba nyii Babilonn ki jena din tee:

Siha nan Hasufa nan Tabaof nan Keros
nan Sia nan Padonn nan Lebana nan Hagaba
nan Salmai nan Hanann nan Gidel nan Gahar
nan Reaya nan Resinn nan Nekoda nan Gasam
nan Usa nan Pasea nan Besai nan Meunim
nan Nefusesim nan Bakbuk nan Hakufa nan
Harhur

nan Baslif nan Mehida nan Haras nan Barkos
nan Sisera nan Tema nan Nesia nan Hatifa
naakuut.

⁵⁷⁻⁵⁹ Solomonn toontunna na naakuut nba din nyii Babilonn ki jene na:

Sotai nan Soferef nan Perida nan Jaala
nan Darkonn nan Gidel nan Sefatia nan Hatil
nan Pokeref-Hasebaim nan Amonn naakuut.

⁶⁰ Yenjiantu ɲasaakak na toontunna yaa-boona, nan Solomonn toontunna yaaboona nba din nyii Babilonn ki jene na, bi kur kann din tee niib kobii ɲantaa nan piinyia nan banlee.

⁶¹⁻⁶² Delaya nan Tobia nan Nekoa naakuut ni niib din tee kobii ɲanloob nan piinna nan banlee, bi din nyii doi nba tee Tel Mela nan Tel Harsa nan Kerub nan Adonn nan Imer-e ki jen, ɲaan bi din ki fit wann nan bi set tee Israel teeb yaaboonae.

63-64 Mannteeb naakuut nba na ḡarin din ki la gbant nba sɔb ki wann bi yeejamm sana: Ḥamme tee Hobaya nan Hakos nan Barsilai naakuut. (Mannteeb naakuuk nba yi Barsilai na, bi yeejae din koon poo ki u nyii Barsilai naakuuk ni, Gilead tiḡ ni, ki u ji din pur u sann ki gaan nan u diamm naakuuk sann.) Baa din ki la gbant nba want bi yeejamm sana na, Juu teeb yudaano na din ki sak ki bi teen mannteebi. ⁶⁵ U din betib a bi kan fit di jeet nba ki bi mann maruḡ ki tur Yennu na, see ki manntoo tan be ki jii bona nba ki bi yir Yurim nan Tumim na ki bann Yennu loomm.

66-69 Binba din nyii Babilonn ki jen na kur din tee niib tusaa piinna nan ḡanlee nan kobii ḡantaa nan piinloob.

Bi toontunna, jab nan poob, din tee tusaa ḡanlore nan kobii ḡantaa nan piintaa nan banlore.

Yanyinna nba din tee jab nan poob din tee kobii ḡanlee nan piinna nan banḡmu.

Taanii din tee kobii ḡanlore nan piintaa nan banloob.

Bontaanii din tee kobii ḡanlee nan piinna nan banḡmu.

Laagumiinba din tee kobii ḡanna nan piintaa nan banḡmu.

Ki bonii tee tusaa ḡanloob nan kobii ḡanlore nan piinlee.

⁷⁰⁻⁷² Niib bonchiann din lakin likiri nan bona ki somm, ki bi saa ḡamm maa Yenjiantu ḡasaakak na:

Juu teeb yudaano na din tur:

salimmona, ki li kpaiu tee nan karwanta borik-
gbina nanna na
nan maruŋ senii piinŋmu
nan mannteeb liatfoot kobii nannŋmu nan piin-
taa.

Ki naakuut yudamm na tur:

salimmona, ki li kpaiu tee nan karwanta baajii
nan waan na
nan salimpeena, ki li kpaiu tee nan karwanta
baajii piik nan nannloob na.

Ki niib nba biar na tur:

salimmona, ki li kpaiu tee nan karwanta baajii
nan waan na
nan salimpeena, ki li kpaiu tee nan karwanta
baajii piik nan nanna na nan mannteeb
liatfoot piinloob nan nannlore.

⁷³ Ki Israel teeb kur, li mannteeb, nan Liifai
teeb, nan Yenjiantu na nasaakak na guura,
nan yanyinna, nan Israel nisiab, nan Yenjiantu
nasaakak na toontunna, din kar Juda digbang-
beŋa nan li digbanbis ni.

8

*Biaŋinba ki Esra karin sennu gbouŋ ki tur
niib na*

¹ Li din tan baat nmaarii nannlore na, ki
soo Israel teeb na kur ji kar bi doi niŋe.
Nmaarik maŋ sinsinn daar, ki bi kur taan
leeb Jerusalem, bi tintaanboor nba ki bi yir
Nyun Tammob na. Ki bi yet Esra, wunba tee
manntoo, ki bia tee sennu banntoo na, a wun
lon sennu gbouŋ na, sennu nba ki Yennu din
tur Moses a wun tur Israel teeb na. ² Njanne ki
Esra baar nan sennu gbouŋ maŋ, siaminba ki

niib na taan be na; li jab nan poob nan waas nba chekit ki mok yan na din be lej. ³ Bi tintaamboor nba be tammokookir po na nie, ki u din karin sennu na ki turib, ki piin sanyapob ni, ki saa tuu yonsuuk ni, ki bi kur gbiint fanu.

⁴ Esra din see daat binbintir nba ki bi kpaas, ki li tee tintaanu man yar na paake. Jab nba nae din see u niidiitu po: Matitia nan Sema nan Anaya nan Yuria nan Hilkia nan Maaseya. Ki binba na mun see u niigan po: Pedaya nan Misael nan Malkija nan Hasum nan Hasbadana nan Sekaria nan Mesulam.

⁵ Esra nba din see binbintir paak na, u din fok gar niib na, ki bi kur ninbina paa u paak. Waa pobit gbouj na yoo nba, ki bi kur fiir set. ⁶ Ki Esra yet a, "Pakin ti Yomdaano Yabint Yennu na."

Ki niib na kur donn bi nii sanpaapo gnan jii a, "Li tee monie." Bi kur din baa fabin tij ni, ki jiant Yennu.

⁷ Ton, bi ji din fiir ki set bi sinsetboa, ki Liifai teeb na kat sennu na ki wantib: Jamme tee Jesua nan Bani nan Serebia nan Jaminn nan Akub nan Sabetai nan Hodia nan Maaseya nan Kelita nan Asaria nan Josabad nan Hanann nan Pelaya. ⁸ Jamme din kpint Yennu sennu na ki tur niib na, ki wannib li paak, ki bi bann.

⁹ Yoo nba ki niib na gbat sennu na nba loon bianinba na, ki li damm bi para, ki bi jak monii. Ki Nehemaya, wunba tee yent yudaano na, nan Esra, wunba tee manntoo ki bia tee sennu man banntoo na, nan Liifai teeb nba wantib sennu na, bet niib na kur a, "Dinna tee kasii daare ki tur ti Yomdaano Yennu, li paak, i daa fabin

koo ki mɔ. ¹⁰ Mɔtana, ii kun man ki saa teen jaamm. Biitir i jeet nan i daan ki tur binba ki mɔk ki li yab na. Dinna tee kasii daare ki tur ti Yomdaano, li paak i daa mɔk parbiiri. Parpeenn nba ki Yennu teeni na saa turi paŋ.”

¹¹ Liifai teeb na din lin ki maant niib na para, ki beerib nan bi daa mɔk parbiir, kimaan li daar maŋ tee kasii daare. ¹² Ŋanne niib na kur ji din kun ki saa dii, ki nyuu, ki mɔk parpeenn, ki chentir baa mɔk linba ki teen bi leeb, kimaan bi din bann baa karin linba ki turib na paaka.

Ki jiin Lanbont jaamm po

¹³ Li daa ŋanlee daar, ki naakuut tɔondamm, nan mannteeb, nan Liifai teeb na saan Esra boor, a bin tumii sennu na nba want bianinba.

¹⁴ Sennu nba ki Yennu tur Moses a wun wann Israel teeb na ni, bi din la sennu nba wann a bin tuu faa lanbont kii koo, lanbont jaamm yoo na. ¹⁵ Li paak, ki bi din lin nan maan na ki tur Jerusalem kur po, nan li digbanlia ni, nan digbanbis ni a, “Saant man kunkona paak, ki saa choo kpek yiinii nan Olif yiinii nan yanpook yiinii nan kaatii yiinii nan tilei nba be, ki faa lanbont, nan sennu na nba wann bianinba na.”

¹⁶ Tɔn, ki niib na lon yiinii na ki faa lanbont bi ŋei yura paak,* nan bi dindont ni, nan Yenjiantu ŋasaakak na dindonjouk ni, nan niib tintaanboor nba kpia Nyun Tammɔb, ki bia kpia Efraim Tammɔb na. ¹⁷ Niib nba kur din nyii Babilonn ki jen na din chaan lanbonte ki daa koo leŋ. Laa din nyii Nunn bija Joosua

* **8:16** 8.16 Bi ŋei yura paak, bi din tuu sere.

yoowa, bi sinsinn lanbont chaanue na, ki soo kur mək parpeenn ki kpamm. ¹⁸ Bi din tuu karin Yennu sennu na waame, daar kur ni, laa nyii jaamm na piinu daar ki saa tuu li joontu. Bi din dii jaamm na daa ɲanlore-e, ki daar nba pukin ɲanniin na ni, ki bi kar li gbennu tintaankaanu, nan sennu nba wann biaɲinba.

9

Biaɲinba ki niib na pak kat bi yanbɔmm

¹⁻² Ɔmaarik maɲ dapiinlee nan ɲanna daare, ki Israel teeb na din taan leeb a bin lor moi, ki lin wann bi parbiir nba tee biaɲinba, bi yanbɔmm paak. Bi poɲ din bokit bi mɔɲ nan boorganu kurawa. Bi din lia bɔtoote ki puk bi yura tanpent, ki li wann bi parbiir, ki bi ji din fiir set, ɲaan piin ki piak kat yanbɔmm nba ki ɲamm nan bi yeejamm din tun na. ³ Bi din jii awa ɲantaae ki karin bi Yomdaano Yennu sennu ki turib, ki awa ɲantaa nba din wei na, ki bi jii ki kat bi yanbɔmm ɲaan jiant bi Yomdaano Yennu.

⁴ Binbintir din be ki tee Liifai teeb sinsetboor, ki Jesua nan Bani nan Kadmiel nan Sebania nan Buni nan Serebia nan Bani nan Kenani, doo ki set. Bi din miar bi Yomdaano Yennu sanpaapowa.

⁵ Liifai teeb nae din tuu be bi tɔɔnn, jiantii ni. Ɔjamme tee Jesua nan Kadmiel nan Bani nan Hasab-neya nan Serebia nan Hodia nan Sebania nan Petahia. Bi din yet a:
“Fiit set ki pak i Yomdaano Yennu.

Ii pak donto nan yoo nba kaa gbennu.
Ɔaant ki soo kur n pak u baakir sann na,

ɲaan nisaarik dontir lek kan jaɲɔ.”

Ki jiin dontir Yenmiaru po

- ⁶ Ki Israel teeb na miar Yennu a:
 “Yennu, fin kɔɔe tee Yennu,
 fine nan sanpaak nan ɲmaabira nba be
 sanpagbouɲ paak na.
 Fine nan tiɲ nan mɔkgbeɲa nan linba kur be li
 ni na,
 fine tur bonfoor kur manfoor.
 Sanpaapo bona kur gbaant ki jiantira.
- ⁷ Yomdaano Yennu, fine gann Abram ki nyii
 nanao Ur nba be Babilonn tiɲ ni,
 fine din lebit u sann ki teen Abraham.
- ⁸ A din la nan u tee nimɔnoe, ki a lor nanao,
 ki senn mɔsonn nan a saa turo Keenann
 teeb, nan Hef teeb,
 nan Amor teeb, nan Peris teeb, nan Jebus
 teeb,
 nan Girgas teeb tinii, ki lii tee tiɲ nba ki u
 yaaboona sii koo.
- A dia a mɔsona, kimaan a tee barmɔnpakirɔe.
- ⁹ “A la ti yeejamm nba dii biak Ijipt biaɲinbawa,
 ki bi din boia sommir po, Mɔkmuɲ na boor,
 ki a gbiint.
- ¹⁰ A din tun bakitnaunɲ toonjaana ki biir Ijipt
 kpanbar na,
 nan u toontunna saakab, nan tiɲ na niib
 kura,
 kimaan a mi baa dinn a niib na biak
 biaɲinba.
- A din nyann, ki gaar sann nba ki a mɔk dinna
 na.
- ¹¹ A din bir sonu mɔkgbeɲir na ni ki tur a niib,
 ki bi somm tinkoonɲ paak ki poot,
 ki binba din waa beerib na dii nyun

nan tann nba tuu baa mɔkɔbenjir ni ki kp̄ii
biaŋinba na.

12 A din tuu dia sanpagbouŋo ki wantib sɔnu
yonnu ni,

ki nyiɔk ki a dia muu ki yentir bi sɔnu.

13 A din nyii sanpaapo ki sik Sainai jɔɔr paak,
ki pak tur a niib,

ki turib sennii nba ŋan, nan wannu nba
took.

14 Fine din wannib a bii dia a foon daar na fanu,
ki teenir kasii.

A din jii a sennii nae ki tur a toontunno Moses,
ki u tur a niib.

15 “Kon nba din soorib yoo nba, ki a turib jeet,
ki li nyii sanpaapo.

Ki nyunnyukuru nba soorib yoo nba, ki a turib
nyun, ki li nyii tanpiiuk ni.

A din betib a bin yent tiŋ nba ki a senn nan a
saa turib na.

16 Ŋaan ki ti yeejamm na donn bi mɔŋ ki teen
tubkangbata,

ki yêṭ bin sak a sennii na.

17 Bi din yêṭ mɔsakuwa, ki tamm linba kur ki a
tun nawa,

ki bia tamm bakitnaug toona nba ki a tun
na.

Bi karinbaanii paak, ki bi gann tɔndaano
a wun jiiib ki ŋmat namm daabisin ni, Ijpt
tiŋ ni,

ŋaan a tee Yennu nba nyikin ki chabite,

ki bia mɔk parmaasir nan lomm, ki a
wutoor ki do yian,

ki a ninbatinu yab, ki a ki nyɔr nyikibi.

18 Bi din maa tingbanne, ki li naan naajabik,

ki yet a ḡanne tee bi yennu nba daan nyii
namm ljipt na.

Yennu, bi din sukiiia bonchiann.

¹⁹ ḡaan a din ki nyikib kunkoouk na paaki,
kimaan a ninbatinu yab.

A din ki jii sanpagbouḡ koo muu nba gar bi
tḡonn
ki wantib sonu yonnu nan nyioḡ na ki yaat
nanni.

²⁰ A binbenḡaḡ paak, ki a din wannib baa saa
teen biaḡinba.

A din dinnib jeet nba tee mana na,* ki bia turib
nyun ki bi nyuu.

²¹ Bina piinna nba ki bi din be kunkoouk paak
na,
ḡaan a din teemm bi bonloḡa kur, bi liant
din ki ban kpet,
ki bi taa din ki moḡr bi sommir paaki.

²² “A te ki bi nyann digbana nan naan yent,
nan tiniu nba ter namm.

Bi din kḡn nyann Hesbonn tiḡ nba ki Sihonn
din dia na,
nan Basann tiḡ nba ki Og din tee leḡ bat
na.

²³ A turib waas ki bi yab nan ḡmaabira nba be
sanpaapo
biaḡinba nae,
ki te ki bi kḡn nyann ki kḡḡ tiḡ nba ki a din
senn
nan a saa tur bi yeejamm na ni.

²⁴ Bi din nyann Keenann tiḡ, fine nyann niib
nba kḡḡ leḡ na.

* **9:20** 9.20 Mana tee jeet nba nyi sanpaapo ki baa tiḡ na
paak.

A din tur a niib na yiikoo a bin tun bianɔnba ki
bi loon

ki tur Keenann teeb nan bi kpanbara.

25 A niib na din nyann digbana nba mɔk
joonpaara, nan tinkpiasa,
ki li ɲei gbee nan mɔkint, ki bunbuna poɲ
gbiira ki be li ni,
nan kpan tiinii nan daan tilontii kpaant
nan tilontilia,
ki bi di baa loon bianɔnba ki gbeɲit,
ki laat bonɲana nba kur ki a teemm, ki bi di
nan parpeenn.

26 “Ŋaan a niib na din yêt a mɔbe, ki lin a poor.
Bi din kp̄ii a sɔkiniinba nba tuu teemm kpaanii
na,
binba beerib a bin ɲmat jen a boor na.

A niib na tuu sukiiæ yoo n tuu yoo.

27 Li paak ki a te ki bi datai nyannib, ki ji diab.
Baa be wahala ni na, ki bi boia sommir po,
ki a be sanpaapo ki gat turib.

A ninbatinu nba yab na paak, ki a turib
toondamm nba fatib bi datai boor.

28 Parmaasir nba din tan be yoo nba na,
ki niib na bia ɲamm tun yanbɔmm,
ki a bia te ki bi datai na nyannib;
ɲaan baa tan kat bi yanbɔmm ki lebit bi binbeɲ
ki boia sommir po yoo nba, ki a be san-
paapo ki gbiint,
ki teenib gatu, ki tintib yoo nan yoo,
a ninbatinu nba yab na paak.

29 A din kpaanib a bin sak a wannu,
ki bi karinbaanii paak ki bi yêt a sennii,
ɲaan a sennu na dianue tee manfoor sɔnu.
Bi moyêtuk nan bi tubkangbatin na paake,

ki bi ḡmant bi poor ki tura.

30 Binn n tuu binn, a teemm kpaanii nan sukuru.

A te ki a sɔkiniinba pak, ḡaan a niib na tee tuukpaae,
li paak ki a te ki digbanlia nyannib.

31 Ḥaan a ninbatinu nba yab na paak, ki a ki nyɔr nyikib,
koo ki boontibi.

A tee parmaasir nan ninbatinu Yennu-e.

32 “Yennu, ti Yennu, a mantik tee Yenjaanne.

A tee jaḡmaansooruk nan yiikoo daanɔe.

A dia a mɔlor nba ki a din senn na nan barmɔnii.

Laa nyii yoo nba ki Asiria kpanbara din dintit biak na

ki tan tuu mɔtana, ti mantik dii farawa.

Ti kpanbara, nan ti tɔɔndamm, nan mannteeb,
nan a sɔkiniinba,

nan ti yeejamm, nan ti niib na kura dii biaka.

Tiat taa mantik dii fara bianḡinba.

33 Faa dat ti tuba na, a tun fanuwa, nan taa lek tun yanbɔmm na,
ḡaan fin ḡarin tuun ḡante.

34 Ti yeejamm, nan ti kpanbara, nan ti tɔɔndamm,

nan mannteeb na din ki dia a sennu na.

Bi din ki ḡbiint a sennii nan a kpaanii na.

35 Fine tee piisin kpanbara paak, ki bi dia a niib.

Ki a turib tiḡ nba yarin ki bia kpai, ki bi be leḡ,
ḡaan ki bi yêḡ bin nyik bi yanbɔmm ki jianta.

36 Ki motana ki ti ji tee yommii, tij nba ki a
turit na ni,
ki li tee tinkpiasir nba teent jeet.

37 Linba ki tij na naan na,
li tee kpanbara nba ki a sennib ki bi diat
na yarae,
kimaan ti yanbomm paak.

Bi diat nan ti tee bonkobit nae,
ki tuun nant baa loon bianjiba, ki ti be
parbichioŋ ni.”

*Ki jiin lor nba ki niib na din taan ki sob na
po*

38 Laa tun nna paak, ki timm Israel teeb taan
leeb ki lor lor, ki sob teenir gbant ni, ki ti
toondamm, nan Liifai teeb, nan mannteeb na
dinn bi yiikoo dinta li paak.

10

¹ Wunba din sint sob u sann gbouŋ na ni tee
min Nehemaya nba tee Hakalia bija na, ki tee
tij na yudaano; ki Sedekaya mun bia sob u
sann. Ki niib nba na mun bia sob bi sana:

annteeb tee:

2-8 Seraya nan Asaria nan Jeremaya
nan Pasur nan Amaria nan Malkija
nan Hatus nan Sebania nan Maluk,
nan Harim nan Meremof nan Obadia,
nan Daniel nan Ginetonn nan Baruk
nan Mesulam nan Abija nan Mijaminn
nan Maasia nan Bilgai nan Semaya.

Liifai teeb tee:

9-13 Joosua, wunba tee Asania bija na,
nan Binnui, ki u nyii Henadad naakuuk ni,

nan Kadmiel nan Sebania nan Hodia
 nan Kelita nan Pelaya nan Hanann
 nan Mika nan Rehob nan Hasabia
 nan Sakur nan Serebia nan Sebania
 nan Hodia nan Bani nan Beninu.

Ki niib na tɔɔndamm tee:

14-27 Paros nan Pahaf Moab
 nan Elam nan Satu nan Bani
 nan Buni nan Asgad nan Bebai
 nan Adonija nan Bigfai nan Adinn
 nan Atir nan Hesehia nan Asur
 nan Hodia nan Hasum nan Besia
 nan Harif nan Anatof nan Nebai
 nan Mag-pias nan Mesulam nan Hesir
 nan Mesesabel nan Sadok nan Jadua
 nan Pelatia nan Hanann nan Anaya
 nan Hosea nan Hanania nan Hasub
 nan Halohes nan Pilha nan Sobek
 nan Rehum nan Hasabna nan Maaseya
 nan Ahia nan Hanann nan Anann
 nan Maluk nan Harim nan Baana.

Ki jiin lor na po

28 Timm Israel teeb, nan mannteeb, nan Liifai teeb, nan Yenjiantu ɲasaakak na guura, nan li yanyinna, nan li toontunna, nan leeb nba kur mɔk mɔsaku nan Yennu sennu, ki pukin ti poob nan ti waas nba chekit ki mɔk yan na, bɔkit ti mɔɲ nan boorganu nba kɔɔ ti tiɲ ni nawa. 29 Ki ti taan leeb ki lor nan ti tɔɔndamm lorjaann nan ti saa dia Yennu sennu na, linba ki Yennu turit, ki li nyii u toontunno Moses boor na. Ti saa sak linba kur ki ti Yomdaano Yennu senn nawa, ti bia saa dia u sennii nan linba kur ki u wannit, ɲaan li-i tee ki ti tan yêt lorjaann maɲ, biak sii be ti paak.

³⁰ Timm nan boorganu nba koo ti tinj ni na, ti kii kooont leeb waas.

³¹ Li-i tee boorganu baar nan jeet, koo linba kur a bin koi turit, ki li tee foon daar, koo kasii daa ni, ti kan daa.

Ki bina njanlore kur ni, ti tuu kan ko kpaant, ti tuu saa piin pana nba ki niib diie, ki bi daa pa.

³² Binn kur ni, soo kur tuu saa lakin salimpeena waan, ki lin jii tun Yenjiantu nasaakak na toona.

³³ Ti saa tur Yenjiantu nasaakak na ni jiantii bona nba nae: kasii boroboro, nan daar kur jeet Yenpiinii, nan bonkobit nba ki bi saa jooob muu, ki li tee daar kur maruŋ, nan kasii Yenpiinii nba tee foon daar yar, nan nmaapaan jaamm yar, nan jaanlia yara, nan kasii Yenpiinii bonlia, nan Yenpiinii nba saa nyinn Israel teeb biit, nan linba kur ki bi sii loon Yenjiantu nasaakak na ni.

³⁴ Timm nba tee mannteeb, nan Liifai teeb, nan nileeb na tuu saa to naatoote binn kur, ki nyinn naakuut nba tuu saa tur daat, ki lin joo maruŋ bona nba ki bi mann ki teen ti Yomdaano Yennu, nan sennu na nba wann biaŋinba na.

³⁵ Binn kur, ti tuu saa baar nan ti sinsinn jeet nba ki ti jaan nae, nan sinsinn tiloona nba monn na, Yenjiantu nasaakak na ni.

³⁶ Soo kur saa jii u bikperik nba tee bonjak, ki saan nana mannteeb boor, Yenjiantu nasaakak na ni, ki saa jiiu tur Yennu nan sennu nba wann biaŋinba na. Ti bia tuu saa jii naabis nba ki ti nei sint marib na, koo pebis koo bubis nba ki ti pei nan buunii sint ki marib nae ki tur Yennu.

³⁷ Binn kur, ti bia tuu saa jii ti sinsinn jeet nba ki ti jaan na yon, ki tur manntoo, Yenjiantu ḡasaakak na ni, ki pukin Yenpiinii nba tee tiloona daan nan olif tiinii kpan, nan tiloonbooru kur nba be.

Ti saa jii ti jeet nba ki ti ko na, li piik ni yennkoo, ki tur Liifai teeb, binba gaan ti kpaant ni jeet piik ni yennkoo na. ³⁸ Mannteeb nba tee Aaronn yaabooona na tuu sii be nan Liifai teeb, yoo nba ki bi gaan bona piik ni yennkoo na, ki Liifai teeb na tuu saa jii piinii na piik ni yennkoo ki koon Yenjiantu ḡasaakak jeet diit na ni, ki bii dia kii tuun Yenjiantu ḡasaakak na toona. ³⁹ Ki Liifai teeb na nan Israel nileebe na tuu saa baar nan bi libina nba tee jeet, nan tiloona daan, nan olif tiinii kpan, ki koonir tiat binbir boa, siaminba ki Yenjiantu ḡasaakak kutsonii be na, ki li tee siaminba ki mannteeb nba tuun toona, nan Yenjiantu ḡasaakak na guura, nan Yenjiantu ḡasaakak yanyinna be na.

Ti kan nyik Yennu ḡasaakak na sommiri.

11

Ki jiin niib nba din koo Jerusalem na po

¹ Toondamm na din kar Jerusalem, ki leeb nba biar na to naatoot ki gann ḡayennkoo, ḡei piik kur ni, a bin saan koo Jerusalem, kasii doo na ni, ḡaan ki leeb nba biar na n koo digbangbeḡa nan digbanbis nba biar na ni. ² Niib na din pak kpakit wunba kur biar sak ki saa koo kar Jerusalem, u tiog lomm ni.

³ Digbangbeḡa nan digbanbis nba din biar na

nie ki niib na, nan mannteeb, nan Liifai teeb na, nan Yenjiantu ɲasaakak na ni toontunna, nan Solomonn ɲaatoontunna yaaboona na din koo. Ki soo kur koo u ɲaak ni, u tɔŋ doo ni.

Niib nba nae din tee tɔondamm nba nyii Juda yent ni, ki koo Jerusalem:

Juda booru ni niibe tee:

⁴ Ataya, ki u baa tee Yusia, ki Yusia baa tee Sekaria, ki u yeejaleeb tee Amaria nan Sefatia, nan Mahalalel, ki bi waa leeb paak ki tee Juda bija Peres yaaboona.

⁵ Maaseya, ki u tee Baruk bija, ɲaan tee Kolhose yaabonn, ki u yeejaleeb tee Hasaya, nan Adaya, nan Joyarib, nan Sekaria, ki bi waa leeb paak ki tee Juda bija Sela yaaboona.

⁶ Ki Peres yaaboona ni jab kobii ɲanna nan piinloob nan banniin nba tee nijaana din kar Jerusalem.

Benaminn booru ni niibe tee:

⁷ Salu, ki u tee Mesulam bija, ɲaan tee Joed yaabonn, ki u yeejaleeb tee Pedaya, nan Kolaya, nan Maaseya, nan Itiel, nan Jesaya, ki bi waa leeb paak, ⁸ nan Gabai nan Salai, ki bi mantik kpiin nan Salu.

Benaminn booru nba din koo Jerusalem na kur din tee niib kobii ɲanyia nan piinlee nan banniime. ⁹ Joel, wunba din tee Sikri bija nae din tee bi tɔndaano, ki Juda, wunba tee Hasenua bija na tee wunba waa paa doo na yudaano paak.

Mannteebe tee:

¹⁰ Jedaya, ki u tee Joyarib bija, nan Jakinn.

¹¹ Seraya, ki u tee Hilkia bija, ḡaan tee Mesulam yaaboonn. Ki u yeejamm bia tee Sadok, nan Merayof, nan Ahitub, ki bi waa leeb paak, ki Ahitub tee mannteeb yudaano.

¹² Niib kobii ḡanniin nan piinlee nan banlee-e din nyii naakuuk na ni, ki tee Yenjiantu ḡasaakak na ni toontunna.

Adaya, ki u tee Jeroham bija, ḡaan tee Pelalia yaaboonn. U yeejamm bia din tee Amsi, nan Sekaria, nan Pasur, nan Malkija, ki bi waa leeb paak. ¹³ Niib kobii ḡanlee nan piinna nan banlee-e din tee ḡei tɔondamm naakuuk na ni.

Amasai, ki u tee Asarel bija, ki tee Asai yaaboonn. U yeejamm din tee Mesilemof nan Imer. ¹⁴ Naakuuk nba na ni din mɔk kunkonkwakita kobik nan piinlee nan banniin, ki bi tɔondaano tee Sabdiel, ki u tee nijaann bik.

Liifai teebe tee:

¹⁵ Semaya, ki u tee Hasub bija, ḡaan tee Asrikam yaaboonn, ki u yeejamm tee Hasabia nan Buni ki bi waa leeb paak.

¹⁶ Sabetai nan Josabad, ki bi tee Liifai teeb yudamm nba din gorii Yenjiantu ḡasaakak na nanyer po toona paak.

¹⁷ Matania, ki u tee Mika bija, ki tee Sabdi yaaboonn, ki Sabdi mun tee Asaf yaaboonn. ḡoo Matania-e din ḡmakitir Yenjiantu ḡasaakak na ni yanyinna, ki bi yiin niipoturu nan Yenmiaru yanii.

Bakbukia, ki u din tee Matania sommtoo.

Abda, ki u tee Samua bija, ki tee Galal yaaboonn, ki Galal mun tee Jedutunn yaaboonn.

¹⁸ Liifai teeb nba din kar Jerusalem, kasii doo na ni, bi kur din tee kobii ŋanlee nan piinniin nan bannae.

Yenjiantu ŋasaakak na guurae tee:

¹⁹ Akub nan Talmonn nan bi nikpiimm, ki bi kur tee kobik nan piinlore nan banlee.

²⁰ Ki mannteeb nan Liifai teeb nba biar na, nan Israel nilee na din kar bi tiŋ ŋei ni, digbanlia nba be Juda yent ni na. ²¹ Yenjiantu ŋasaakak na toontunna din kɔɔ Jerusalem, bokir nba ki bi yi Ofel nae, ki Siha nan Gispa tee bi saakab nba gorii toonn na paak.

²² Saakɔɔ nba gorii Liifai teeb nba be Jerusalem na sann din tee Usi, ki u tee Bani bija, ŋaan tee Hasabia yaabonn, ki u yee-jamm bia din tee Matania nan Mika, ki ŋɔɔ Usi tee Asaf naakuuk ni nirɔ; naakuuk maŋe din yen ŋasaakak na ni yanyinu. ²³ Naan sennu din be ki want bianŋinba ki naakuut na sii yiin yanii ki gaan leeb, Yenjiantu ŋasaakak na ni, daar kur.

²⁴ Ki Petahia nba tee Mesesabel bija, ki nyii Sera naakuuk ni, ki tee Juda booru na, ŋɔɔe din see Israel teeb paak, Peesia kpanbar boor.

Ki jiin niib nba kɔɔ digbanlia ni na po

²⁵ Niib na bonchiann din kar doi nba kpia nan bi kpaante. Binba din nyii Juda booru ni na din kar Kiriaf Arba, nan Dibonn, nan Jakobseel nan digbanbis nba kpia digbangbeŋa na. ²⁶ Bi bia din kar Jesua nan Molada nan Befpelet, ²⁷ nan Hasar-sual, nan Beerseba, nan digbanbis nba kookir. ²⁸ Bi din kɔɔ Siklag doo

ni, ki li be Mekona yent ni, nan li digbanbis ni, ²⁹ ki bia koo En-rimonn nan Sora nan Jarmuf ³⁰ nan Sanoa nan Adulam, nan digbanbis nba kpia digbangbeña na. Bi bia din koo Lakis nan kpaant nba kpiar na, nan Aseka nan li digbanbis ni. Li wann nan Juda teeb din koo yent nba be Beerseba, ki li be niidiitu po na, nan Hinom baauk nba be niigaj po na sinsuuk nie.

³¹ Niib nba din nyii Benjaminn booru ni na din koo Geba, nan Mikmas, nan Ai, nan Betel, nan digbanbis nba kpiar nae, ³² nan Anatof, nan Nob, nan Anania, ³³ nan Hasor, nan Rama, nan Gitaim, ³⁴ nan Hadid, nan Seboyim, nan Nebalat, ³⁵ nan Lod, nan Ono, nan Tikpeera Baauk na ni. ³⁶ Liifai teeb nba din tuu kar Juda yent ni na, bi din bokit bi siab, ki bi saan koo nan Benjaminn booru ni niib.

12

Mannteeb nan Liifai teeb sanae na

¹ Mannteeb nan Liifai teeb nba din nyii Babilonn, ki ñamm nan Serubabel, wunba tee Sealtiel bija, nan Joosua, ki u tee mannteeb yudaano na, tok jen na sanae na:

Mannteeb na sanae tee:

²⁻⁷ Seraya, nan Jeremaya, nan Esra, nan Amaria nan Maluk nan Hatus nan Sekania, nan Rehum nan Meremof nan Ido, nan Ginnetoi, nan Abija, nan Mijaminn, nan Madia nan Bilga, nan Semaya nan Joyarib nan Jedaya nan Salu nan Amok nan Hilkia nan Jedaya.

Jab nba nae din tee mannteeb maṅ kura tɔondamm, mannteeb yudaano Joosua yoo.

Liifai teeb:

⁸ Liifai teeb nae tee binba din gorii ki bi yiin niipoturu yanii. Ŋamme tee Jesua nan Binnui nan Kadmiel nan Serebia nan Juda nan Matania.

⁹ Binba nae din tee mɔtaauk yanyinna nba din tuu gaan yanii. Ŋamme tee Bakbukia, nan Uno, nan bi Liifai-leeb.

Ki jiin mannteeb yudaano Joosua yaaboona po

¹⁰ Joosua-e din tee Joyakim baa, ki Joyakim tee Eliasib baa, ki Eliasib tee Joyada baa, ¹¹ ki Joyada tee Jonatann baa, ki Jonatann tee Jadua baa.

Ki jiin tɔondamm nba nyii mannteeb naakuut ni na po

¹²⁻²¹ Yoo nba ki Joyakim din tee mannteeb yudaano na, ki mannteeb nba na tee tɔondamm nba be mannteeb naakuut ni:

Maraya din tee Seraya naakuuk yudaano
 ki Hanania tee Jeremaya naakuuk yudaano
 ki Mesulam tee Esa naakuuk yudaano
 ki Jehohanann tee Amaria naakuuk yudaano
 ki Jonatann tee Maluki naakuuk yudaano
 ki Joosef tee Sebania naakuuk yudaano
 ki Adna tee Harim naakuuk yudaano
 ki Helkai tee Merayof naakuuk yudaano
 ki Mesulam tee Ginetonn naakuuk yudaano
 ki Sikri tee Abija naakuuk yudaano
 ki Miniaminna naakuuk yudaano sann kaa,
 ki Piltai tee Moadia naakuuk yudaano

ki Samua tee Bilga naakuuk yudaano
 ki Jehonatann tee Semaya naakuuk yudaano
 ki Matenia tee Joyarib naakuuk yudaano
 ki Usi tee Jedaya naakuuk yudaano
 ki Kalai tee Salai naakuuk yudaano
 ki Eber tee Amok naakuuk yudaano
 ki Hasabia tee Hilkia naakuuk yudaano
 ki Netanel tee Jedaya naakuuk yudaano

Ki jiin mannteeb nan Liifai teeb hei saakab po

²² Bi din sob Liifai teeb nan mannteeb hei saakab sana na, yoo nba ki mannteeb yudamm daa din be na. Hamme tee Eliasib, nan Joyada, nan Jonatann nan Jadua. Sana na din sob yoo nba ki Darius tee Peesia kpanbar nae.

²³ Liifai teeb hei saakab sanae na, bi din sob teen maan gbant nie ki tan tuu Jonatann, wunba tee Eliasib yaaboonn na yoo.

Ki jiin Yenjiantu nasaakak na ni toona biitu po

²⁴ Hasabia nan Serebia, nan Jesua nan Binui nan Kadmiel-e din tee saakab nba bokit Liifai teeb na koonn koonn. Koonn munlee din tuu lakin, ki koonyenn yiin ki dontir Yennu, ki leeb na gaan ki teeno niipoouk nan kpanbar Defid, wunba tee Yennu niro na nba wann bianjinba na.

²⁵ Yennu nasaakak guura nba nae din guu tiat diit nba kpia nan nasaakak tammoi na, hamme tee Matania nan Bakbukia, nan Obadia, nan Mesulam nan Talmonn, nan Akub.

²⁶ Niib nba na din be Joyakim, wunba tee Joosua bija, naan tee Jehosadak yaaboonn na

yoo, ki bia be min Nehemaya nba tee yent na yudaano na yoo, ki bia be Esra nba tee manntoo ki tee sennu banntoo na yoo.

Biaŋinba ki min Nehemaya jii doo na joonn ki tur Yennu

²⁷ Yoo nba ki bi din jii Jerusalem doo joonn ki tur Yennu na, ki bi tun siaminba kur ki Liifai teeb be, ki yiimm a bin taan tintaanu ki jiin baa jikin joonn na ki teen Yennu na po, ki yin niipoturu yanii nan bonmumoot nba tee duunii nan kona. ²⁸ Liifai naakuut nba tee yanyinna na din nyii baa kar siaminba kur, ki li kpia Jerusalem, ki bia nyii doi nba kpia Netofa, ²⁹ ki bia nyii Bef-gilgal nan Geba nan Asmafef, ki baar Jerusalem. ³⁰ Mannteeb nan Liifai teeb na din ŋamm bi moŋ nan niib na, nan tammoi, nan doo na joonn.

³¹ Ki n te Juda toondamm na doo joonn na yur paak, ki n bokit yanyinna na koonjaana ŋanlee, a bin somm lint doo na kii teen Yennu niipoouk.

Ki sinsinn koonn na gaar niidiitu po, joonn na yur paak, ki jiin Tanpenn Tammob na po. ³² Ki Hosaya somm waa yanyinna na poor po, ki Juda toondamm bokir waa paa. ³³⁻³⁵ Ki mannteeb nba din peeb naatuna, ki waa paa na tee Asaria, nan Esra nan Mesulam nan Juda, nan Benjaminn, nan Semaya nan Jeremaya. Wunba din wei pukin tee Sekaria, ki u tee Jonatann bija, ŋaan tee Semaya yaaboonn. (Ki u yeejaleeb tee Matania nan Mikaya, nan Sakur, ki bi waa leeb paak ki nyii Asaf naakuuk ni.) ³⁶ Niib nba din wei paan Sekaria paak na nyi u naakuuk nie, ki bi sana tee Semaya nan

Asarel, nan Milalai, nan Gilalai, nan Maai nan Netanel, nan Juda, nan Hanani. Bi kur din dia bonmumoot booru nba ki Yennu nirɔ, kpanbar Defid din faa nae. Esra, wunba tee banntɔ nae din lii koonn na tɔonn. ³⁷ Baa din baar tammɔb nba ki bi yir Nyuntonn Tammɔb na, ki bi tɔkin sɔnu nba do Defid doo niŋ na, ki baar gar kpanbar Defid ŋaak, ki ŋmat doo jonn na tammɔb nba ki bi yir Nyun Tammɔb na boor, ki li be doo na yondo po.

³⁸ Ki koonleer nba yiin niipoturu yaŋ na gaar gaŋ po, jonn na yur paak, ki min nan niib na bɔkir wei bi poor. Ki ti somm difoouk nba ki bi yir Bonpur Difoouk na paak, ki saa gar ki baar Joon-yarinn na boor, ³⁹ ki nyii leŋ ki somm ki saa gar tammɔb nba ki bi yir Efraim tammɔb na, nan Jesana tammɔb na, nan Janii tammɔb na, nan Hananiel difoouk, nan Kobik difoouk na, ki ji baar tammɔb nba ki bi yir Pei tammɔb na. Ti din gbenn ti sommir na Yenjiantu ŋasaakak tammɔkɔkir na boore.

⁴⁰ Ki koonn munlee nba teen Yennu niipoouk na baar Yenjiantu ŋasaakak na boor.

Tɔondamm na bɔkir din be n boor, ⁴¹ ki pukin mannteeb nba peeb naatuna, ki bi sana tee: Eliakim, nan Maaseya nan Miniaminn, nan Mikaya nan Eliwenai nan Sekaria, nan Hanania. ⁴² Ki Maaseya nan Semaya nan Eleasar nan Usi nan Jehohanann nan Malkija nan Elam nan Eser din wei paan bi paak. Ki Jesrahia ŋmakitir yanyinna na, ki bi yiin nan kunkɔpaara.

⁴³ Li daar maŋ bi din mann marint bonchiann, ki niib na ji mɔk kpinkpammuk, kimaan

Yennu-e te ki bi mək parpeenn bonchiann. Ki poob nan waas na kur taamm ki kpamm, ki fuur nba ki bi fu na saa banfəkir bonchiann.

Biaŋinba ki bi lon Yenjiantu ŋasaakak na ni Yenjiantbona

⁴⁴ Li yoo na ki bi nyinn jab nba sii gorii Yenjiantu ŋasaakak na ni tiat nba ki bi lib na binbir boor, ki li tee bona piik ni yennkɔɔ, nan binn ni jeet kur sinsinn jaaun, nan sinsinn loona nba ki bi pɔɔr. Jab nba nae ki li din kpaab nan bii gaan jeet libina nba nyi kpaant nba be bi yentnba ni, ki li tee mannteeb nan Liifai teeb yara, nan sennu na nba wann biaŋinba na. Ki Juda niib na kur mək parpeenn, mannteeb nan Liifai teeb na paak, ⁴⁵ kimaan baa din mann yanbomm wuuru maruŋ, nan toonlia nba ki Yennu senn paak na. Yenjiantu ŋasaakak na ni yanyinna, nan Yenjiantu ŋasaakak maŋ guura na mun din tun bi toona, ki li wei nan kpanbar Defid nan u bija Solomonn nba din wann biaŋinba na. ⁴⁶ Laa nyii kpanbar Defid nan Asaf, wunba tee yanyinnɔ na yoowa, yanyin-tɔɔndamme din tuu ŋmakitir yanyinna, ki bi yiin ki dontir Yennu, ki bia teenɔ niipoouk. ⁴⁷ Serubabel nan Nehemaya yooe, ki Israel teeb na kur din tuu teen daar kur piinii, a lin somm Yenjiantu ŋasaakak na yanyinna nan guura na. Niib na din tuu teen Liifai teeb na bi tora, ki Liifai teeb na mun teen mannteeb bi tora.

13

Biaŋinba ki bi bokit bi mɔŋ nan boorganu

¹ Yoo nba ki bi din karin Moses sennu sanpaapo ki tur niib na, ki bi tan baar sobu na ni siar boor, ki li yet nan bii mi ki bin gaar Amonn koo Moab niro ki wun pukin Yennu niib na po, ² kimaan Amonn nan Moab teeb na din ki tur Israel teeb na jeet nan nyun, baa din nyii Ijipt ki paa sonu paak na, naan bi din pa likiriie ki tur Balam a wun mo Israel teeb motont, naan ki Yennu tunn motont na ki li tee piisin. ³ Yoo nba ki bi din karin sennu na, ki Israel teeb gbat na, ki bi bokit bi moḡ nan boorganu nba koḡ namm na.

Bianjinba ki Nehemaya ḡamm niib na bin-beḡ

⁴ Manntoḡ nba ki bi yiu Eliasib, ki u gorii Yenjiantu ḡasaakak na tiat binbir boor na, din man nan Tobia ki li yukir bonchiann. ⁵ U din sak ki Tobia doḡ digbenḡir nba ni ki bi tuu birin Yenpiinii jeet nan bonnunubit, nan bona nba ki bi sii dia tuun nann Yenjiantu ḡasaakak ni, nan Yenpiinii nba tee mannteeb yar, nan jeet piik ni yennkoḡ, nan li tiloḡna daan nan li kpan nba ki bi teen Liifai teeb, ki bia teen Yenjiantu ḡasaakak na ni yanyinna, nan Yenjiantu ḡasaakak na guura na. ⁶ Laa din tun nna yoo nba, ki soḡ ki n kaa Jerusalem, kimaan Artaserses, wunba din tee Babilonn kpanbar na naan dinu bina piintaa nan ḡanlee nie, ki n din ḡmat wann n moḡ ki turo. Li din jii yoo waamewa ki u turin yaak, ⁷ ki n ḡmat Jerusalem. Li yoee ki n ji bann bonbiir nba ki Eliasib tun, kimaan waa chab Tobia diyounḡ, Yenjiantu ḡasaakak na ni, ki u doḡ na. ⁸ Ki n

wutoor doo, ki n nyinn Tobia tiat kur ki lu, ⁹ ki tur mɔb a bin wuur ɲamm diit na, ki jiin koon Yenjiantu ɲasaakak na tiat nan Yenpiinii jeet nan bonnunubit na.

¹⁰ Ki n bia gbat nan Yenjiantu ɲasaakak na ni yanyinna, nan bi Liifai leeb nyik Jerusalem ɲaan ɲmat bi kpaant ni, kimaan niib na ki teemm jeet nba janitibi. ¹¹ Ki n yakii nan tɔɔndamm na, nan baa ɲaan ki ɲasaakak na biar yann na, ɲaan ji te Liifai teeb nan yanyinna na ɲmat jen ɲasaakak na ni, ki ɲamm piin bi toona. ¹² Tɔɔn, ki Israel teeb na kur ɲamm piin ki baat nan bi jeet kur piik ni yennkɔɔ, nan tilɔɔna daan nan kpan, ki kɔɔnt Yenjiantu ɲasaakak tiat diit na ni. ¹³ Ki n jii jab nba na ki sennib ki bi gorii tiat diit na: Ɔjamme tee Selemia, ki u tee manntɔɔ, nan Sadok, ki u tee sennu banntɔɔ, nan Pedaya, ki u tee Liifai nirɔ. Ki Hanann, wunba tee Sakur bija, ɲaan tee Matania yaaboonn na din tee bi sommtɔɔ. N din mi nan jab nba nae ki n saa teemm yada nan bi tee nimɔmm, ki sii biitir jeet fanu ki teen bi toontunleeb.

¹⁴ Yennu, tiat linba kur ki n teen ki tur a jiantu ɲasaakak na nan li toona.

¹⁵ Li yoo na ki n la niib be Juda ki ɲmakii daan tilɔɔna, foon daar, ki siab paant jeet, nan daan, nan daan tilɔɔna, nan kinkana, nan jiklia bi bonii paak, ki saa nann Jerusalem; ki n kpaamm nan bi daa kɔi siar foon daar. ¹⁶ Nisiab din nyii Taya doo ni ki kɔɔ Jerusalem ki baat nan janii nan tabooru kur ki tan kɔi teen ti niib na foon daar. ¹⁷ Ki n yakii nan Juu teeb tɔɔndamm na ki yetib a, “Gotir bonbiir nba ki i

tuun na. I kooont foon daar na jakinte. ¹⁸ Linba na booru paake ki Yennu din dat i yeejamm tuba, yoo nba ki u din baar nan biiru, doo na paak na. Ŋaan ki i bia lek yiab ki kooont foon daar na jakint, ki te Yennu wutoor ŋamii do Israel teeb paak.”

¹⁹ Li paak ki n din tur mɔb nan bin tuu loon doo na tammokooka na gana, foon daar kur, ki daa lootir ki tan tuu yoo nba ki foon daar saa gar. N din jii n jab na siabe ki bi guu tammɔi maŋ, a bi daa te ki soɔ koo nan siar doo na ni, foon daari. ²⁰ Taar yomm koo munlee-e ki kpinkpenta nba kɔi tabooru kur na doɔr doo na joonn nanyer po nyiok, ki li saa yent foon daar.

²¹ Ki n yakii namm a, “Li ki mɔk nyosiat nan yin tuu baar ki doɔr leŋ ki guu sanyiok yentu-u. Yi-i jikii ŋamm tun linba na, n saa baar nan mabire i paak.” Laa din nyii li yoo ki saa, bi ji din ki jen foon daari. ²² Ki n tur Liifai teeb na mɔb a bin ŋamm bi mɔŋ, ki saan kii guu tammɔi na, ki lin te foon daar na-ii tee kasii.

Yennu, ii tian n po, linba na paak, ki tinin ninbaauk, kimaan a lomm nba yab na paak.

²³ Li yoo na, ki n bia bann nan Juu jab na bonchiann koon poob, ki bi tee binba nyii Asdod nan Amonn nan Moab booru ni. ²⁴ Ki bi waas na bokir piak Asdod danmaan koo maboorganii, ŋaan ji kan fit pak ti danmaami.

²⁵ Ki n yakii nan jab na ki porib mɔb, ki boob, ki gut bi yut, ki te bi lor molor Yennu sann ni nan ŋamm koo bi waas kan ban koon boorganu. ²⁶ Ki n betib a, “Li din tee boorganu bonpoi koonu paake ki kpanbar Solomonn tun

yanbɔmm. Ɔɔɔe din tee kpanbarjaann ki gar kpanbara kur nba be digbanlia ni. Yennu din loonɔ ki teenɔ Israel teeb kura kpanbar, ɲaan u lek din tan tun yanbɔmm na booruwa. ²⁷ Ti wei i binbeɲ na ɲaan yêť Yennu mɔb, kii jiki kɔont boorganu bonpoi-i?”

²⁸ Joyada din tee mannteeb yudaano nba ki bi yiu Eliasib na bija, ɲaan Joyada bonjai na yeno din kɔon Sanbalat wunba nyii Bef Horonn doo ni na bipooe. Li paake ki n te Joyada nyii Jerusalem.

²⁹ Yennu, tiat niib na nba biir mannteeb toona nan mɔlor nba ki a din lor nan mannteeb nan Liifai teeb na.

³⁰ N ɲamm niib na ki nyinnib linba kur tee jakint niwa, ki turib sennii nba tee mannteeb nan Liifai teeb yar, ki li te soɔ kur mi u toonn.

³¹ N te ki bi sii baat nan daat nba ki bi sii jokin Yenpiinii nba ki bi baat nann na yoo nba jaɲ, ki bia te niib na sii baat nan bi Yenpiinii nba tee binn ni jeet kur sinsinn jaaɲ.

Yennu, tiat linba na kur ki ɲammin.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d